

重修祁州續志序

禹貢分九州而詳紀山川土賦後世志書實以此爲權
輿然尙無志之名也周禮小史氏掌邦國之志志之名
於是昉地理志始於漢書食貨藝文各志并見於隋然
尙未分郡縣而志之也唐李吉甫上元和郡縣志宋王
存等撰元豐九域志其於州縣廢置與夫鎮戍城堡之
名山澤虞衡之利無不詳悉著錄四庫全書提要稱
其深得古人辨方經野之意足資考核爲他志之所不
及洵是論也然前代之地志與今時之地志其沿革不

同一代之地志與一方之地志其體例又各異是非酌古準今因時制宜無以信今而傳後也同治庚午 合肥相國督畿輔倡修畿輔通志檄各府州縣以次舉行祁州牧江右趙君董率邑紳劉孝廉學海首以祁州續志告成而問敘於予予維志史例也首貴詳備弗備則陋次貴核實弗實則謬以祁壤地褊小非有名山大川足以壯觀瞻而誇雄勝非有名區古蹟足以資掌故而供搜探又非有重關阻隘足以扼天下之吭而稱天下之險况復年湮代遠文獻無徵地瘠民貧簡陋相襲務

夸飾或附會而失真務攀附或荒蔓而無據區區最爾
之區瑣屑之事烏足以潤色鋪張成一時之鉅製哉然
地域之廣表戶口之繁衍人文之蔚起與夫忠孝節義
嘉言懿行之膾炙人口者不採輯而編綴之久則與荒
煙蔓草同歸銷沒已耳况舊志之修迄今已百有餘歲
及此不修後將奚據趙君殫精竭慮於窮鄉僻壤之中
網羅散失一長亦錄無幽不闡凡有關於人心風俗者
一一採訪而表彰之條分縷析綱舉目張體例一遵舊
志考禮必極詳確刪汰揀擇良吏之心苦矣是志之續

亦烏可緩乎抑吾聞趙君治祁多善政莅任以來百廢俱舉而於河渠隄防尤如意修築俾祁民無漂沒憂祁人至今賴之修志一事僅善政之一端也因不揣固陋而樂爲之序

詔授中議大夫

賜進士出身 賞戴花翎鹽運使銜知直隸保定府事

滇南李培祐撰

祁州續志序

祁州志修於乾隆二十年百餘年來絕無嗣響余履祁之明年卽奉修志之令自維一長莫擅遑論其三惴惴焉以不克終事是懼且舊志出刁孝廉錦手結構謹嚴修之則恐貽笑續貂因謀諸劉孝廉學海曰志不易修若採訪數十年以來近事分類記之作爲續志其可也孝廉曰善於是出示四鄉紳士耆老各以見聞聞源源錄送而屬孝廉秉筆焉厯兩年之久哀然成集余覆加校訂釐爲四卷體例一遵舊志惟舊志中昔有而今

無者汰之事同而名分者合之以歸簡要復蒙郡伯李
靜山都轉俯賜丹黃一一刊正使無遺憾是役也屬辭
比事未知與舊志何如第自輿地以至記事所採各條
無不事求實是不濫不誣則庶幾焉獨是余任祁四載
毫無實惠於民比年以來修理 文廟 文昌宮河道

橋梁衙署前後屢興工作而祁民俱能踴躍從事雖勞
不怨卽修志之事亦賴衆紳士實心實力相助爲理使
得籍手以告成功豈能強之使然哉蓋祁雖最爾邑在
明有金公章本朝有刁公包均以理學名儒正己化俗

其流風餘韻猶有存者故民知上下之分而樂爲之用
觀其忠義之風行乎閭巷節烈之氣著於閭幃同治七
年賊匪肆擾州民老幼婦孺殉難者至二千餘人是固
正氣之鍾於邦人者厚抑亦先儒教澤之未泯也後之
守是邑者幸勿以壤地褊小而薄視祁民則祁民幸甚
志旣成因識其續而弗修之意於簡端

光緒建元孟冬初吉 賞戴花翎鹽運司運同銜知祁
州事南豐趙秉恆撰

校訂續志小序

劉學海

州志脩於乾隆二十年已百有餘歲人物事蹟已難盡
考如再不續輯後必多湮沒而不彰前因舊誌版片與
刁蒙吉先生書板俱遭回祿

海

曾與小邨中倡勸捐資

一同完補第緣捐項無多終以未能續修爲憾今幸我
子常趙牧伯以南豐世族由高平陞任茲土下車伊始

海

初進謁卽以脩志爲面命洵盛舉也嗣是牧伯多善

政嫉惡如讐則狐鼠潛形萑苻破膽矣保民若赤則吏
舍冬寒茅簷春暖矣每月課士旣飲食之又獎勵之則

春風共坐化雨均霑矣廉俸所餘廢者必脩首學宮次

文昌閣次忠義祠次公署次橋梁莫不煥然一新矣至

修志事則命

海

先爲校訂伏思志猶史也作史必具三

長脩志亦如之

海

以樗櫟庸才學疏識淺又兼年逾八

旬老境頽唐奚能勝任牧伯曰否否志者誌其實也其

實不沒弗文何害不必言脩續之可也

海

應之曰唯唯

爰據四鄉所採訪者照舊志以類續之草創而已若夫

討論脩飾潤色則皆我牧伯裁定之

海

無能爲役是爲

序

監定總裁

賜進士出身花翎鹽運使銜知保定府事

李培祐

花翎運同銜前任祁州知州

趙秉恆

特授祁州知州加十級紀錄十次

朱閏保

協裁

祁州學正

張履祺

祁州訓導

龐遇榮

督刊

祁州吏目

俞芳

纂續

戊子科舉人加五品銜內邱縣訓導邑人劉學海

六品頂戴古項廩生韓翼亮

採訪

副榜孟賓興
庠生李際昌
廩生宋玉珊

廩生馬殿元
庠生蘇元鳳
庠生党永錫

膳錄

庠生劉智元
庠生徐毓璋
庠生張錦堂

庠生韓汝梅

校字

廩生劉英三

廩生李德馨

捐梓

凡例

一舊志重修於乾隆二十年迄今百有二十餘歲矣
風微人往文獻無徵所續未免不全不備之憾然
及今不續後之視今猶今之視昔恐並此不全不
備者亦都歸烏有故此編僅誌所知罅漏雖多較
聽其湮沒者差勝焉識者諒之

一舊志分輿地建置賦役官師選舉人物藝文記事
爲八卷茲皆仍舊依類續之

一舊志各類皆有敘後有論茲續而不修惟忠烈

一門專紀殉難紳民婦女爲舊志所無故弁一小序以補舊志之闕餘概仍舊不再作敘論

一輿地城治衙署等圖舊志已登似無庸贅然年逾百餘載沿革不同茲按現在形勢仍繪錄以備參考

一輿地僅志河道賦役僅志留支徵解非太略也以昔有今無者不必載今與昔無大異者亦不必載也

一官師百餘年來豈無文章政事卓卓可觀者而名

宦竟不一見不無遺憾舊志官師門雖有書名之
例而斯邑經同治七年兵燹之餘卷牘半成灰燼
人地出身俱難盡考求僅書其名亦有不全不備
者第志所知再者舊志有州同州判州判已經裁
汰州同又移往永定河故皆不載

一選舉舊志有遺漏者俱爲補出人物藝文亦有補
遺者

一人物節孝忠烈皆宜詳載實事里居惟以數千人
之多難盡詳查故節孝少詳多略忠烈紳士從詳

民人從略雖未盡昭詳備然節孝盡載其氏俾同
入節孝祠忠烈盡載其名俾同入忠烈祠其氏與
名不朽其心當亦無憾矣

一節孝最關風化其以柏舟自守矢志靡它者固堪
嘉尙乃有義不受辱殺身成仁尤爲難能而可貴
除將尋常守節者仍按舊志編入節孝門外增出
烈婦烈女二門以示區別

一續志採訪固須核實紀載尤慮遺漏故凡採訪所
及除不宜入志者餘一概敘錄善善從長也

一義學創建之由已載建置以內但恐日久仍歸廢弛茲特繪爲圖式並將條款附刻於後庶不至始終易轍

一此次續志皆由邑紳徧加採訪彙送局董劉孝廉參酌編定但恐歷年已久採訪難周如有遺漏再行增補

一續志歷年多遺漏者必多歷年少遺漏者自少三十年爲一世後如三十年一續人物事蹟庶無遺漏矣是所望後之君子